岩头全藏禅师语录

岩头全奯禅师

《岩头全奯禅师语录》

2022年5月排版



以般若为宗 以总持为法 以净土为归

编者序

岩头一生所留言语较少,散见于各灯录中。为方便后 人学习,后学收集了《五灯会元》、《景德传灯录》、 《祖堂集》和《联灯会要》中关于岩头全豁禅师的记载, 将禅师的语录和行状按照德山下、岩头沙汰、卧龙弘法的 时间顺序进行了汇集和排序整理,其中卧龙弘法部分又按 照开示、勘验行录、问答的顺序罗列。本辑录主要以五灯 会元为底本,旁参其他三本书籍合录而成。整理匆忙,多 有不当及错漏,望阅者明鉴。

后学莲子谨叩

二〇一一年七月十七日

全文

鄂州岩头全奯禅师,泉州柯氏子。少礼青原谊公,落 发往长安宝寿寺,禀戒习经律诸部,优游禅苑,与雪峰、 钦山为友。自杭州大慈山逦迤造于临济,属济归寂,乃谒 仰山。才入门,提起坐具曰: "和尚!"仰山取拂子拟 举,师曰: "不妨好手。"

后参德山, 执坐具上法堂瞻视。山曰: "作么?"师便喝。山曰: "老僧过在甚么处?"师曰: "两重公案!"乃下参堂。山曰: "这个阿师稍似个行脚人。" (《祖堂集》此段为:后参德山。初到参,始拟展坐具设礼。德山以杖挑之,远掷阶下。师因便下阶收坐具,相看主事参堂。德山谛视,久而自曰: "者阿师稍似一个行脚人。")

至来日上问讯,山曰:"阇黎是昨日新到否?"曰: "是。"山曰:"甚么处学得这虚头来!"师曰:"全奯 终不自谩。"山曰:"他后不得孤负老僧。 一日,参德山,方跨门便问: "是凡是圣?"山便喝。师礼拜。有人举似洞山,山曰: "若不是奯公,大难承当。"师曰: "洞山老人不识好恶,错下名言。我当时一手抬,一手搦。"

雪窦云: "然则德山门下,草偃风行。要且不能塞断天下人口。当时才礼拜,劈脊便棒,非唯剿绝洞山,亦乃把断豁老!还会么?将军自有嘉声在,不得封侯也是闲。" 教忠光云: "还知三大老落处么?德山和身放倒,洞山带水拖泥。若非岩头具通方眼,争显功高汗马!且作么生是一手抬一手搦处?杀人刀活人剑!"

雪峰问德山: "从上宗乘,和尚此间,如何禀授与人?"德山云: "我宗无语句,实无一法与人。"师闻举云: "德山老汉一条脊梁骨拗不折。虽然如此,于唱教中犹较些子。"

保福拈问长庆: "岩头平生出世,有什摩言教过于德山,便道'犹较些子'?"长庆举师示众云: "若是得意底人,自解作活计。举措悉皆索索底,时长恬恬底。触物则传,意在传处。住则铲住,去则铲去。须于欲去不去、

欲住不住处体会。不执物,不据物。不同室塞人紧把著事不解传得,恰似死人把玉擩玉相似。纵然传得,直到驴年有什摩用处?且愧伊向这里凑泊,不别运为。讶将去,钻将去,研将去,直教透过,直教通彻。不见道: '如人学射,久久方中'?"有人问: "中时如何?"师云: "莫不识痛痒摩?"

雪峰在德山作饭头,一日饭迟,德山擎钵下法堂。峰晒饭巾次,见德山乃曰:"钟未鸣,鼓未响,拓钵向甚么处去?"德山便归方丈。峰举似师。师曰:"大小德山未会末后句在。"山闻,令侍者唤师去。问:"汝不肯老僧那?"师密启其意。山乃休。明日上堂,果与寻常不同。师至僧堂前,拊掌大笑曰:"且喜堂头老汉会末后句,他后天下人不奈伊何!虽然,也只得三年活。"(山果三年后示灭。)

一日,与雪峰、钦山聚话。峰蓦指一碗水。钦曰: "水清月现。"峰曰:"水清月不现。"师踢却水碗而去。 德山一日谓师曰: "我这里有两僧入山,住庵多时,汝去看他怎生。"师遂将一斧去,见两人在庵内坐。师乃 拈起斧曰: "道得也一下斧,道不得也一下斧。"二人殊 不顾。师掷下斧曰: "作家!作家!"归,举似德山,山 曰: "汝道他如何?"师曰: "洞山门下不道全无,若是 德山门下,未梦见在。"

师与雪峰同辞德山,山问:"甚么处去?"师曰: "暂辞和尚下山去。"曰:"子他后作么生?"师曰: "不忘。"曰:"子凭何有此说?"师曰:"岂不闻:智 过于师,方堪传受;智与师齐,减师半德。"曰:"如是 如是,当善护持。"二士礼拜而退。

师共雪峰到山下鹅山院。压雪数日,师每日只管睡,雪峰只管坐禅。得七日后,雪峰便唤: "师兄且起。"师云: "作摩?"峰云: "今生不著便,共文遂个汉行数处,被他带累。今日共师兄到此,又只管打睡。"师便喝云: "你也口+童眠去摩?每日在长连床上,恰似漆村里土地相似!他时后日,魔魅人家男女去在!"峰以手点胸

云: "某甲这里未稳在,不敢自谩。"师云: "我将谓汝 他时后日向孤峰顶上盘结草庵,播扬大教,犹作这个语 话?"峰云:"我实未稳在。"师云:"汝若实如此,据 汝见处一一道来。是处与你证明,不是处与你铲 却。"峰曰:"我初到盐官,见上堂举色空义,得个入 处。"头曰:"此去三十年,切忌举著。"峰曰:"又见 洞山过水偈曰: '切忌从他觅,迢迢与我疏。渠今正是 我,我今不是渠。'"头曰:"若与么,自救也未彻 在。"峰又曰: "后问德山: '从上宗乘中事,学人还有 分也无?'德山打一棒曰:'道甚么!'我当时如桶底脱 相似。"头喝曰:"你不闻道,从门入者不是家珍。"师 曰: "他后如何即是?"头曰: "他后若欲播扬大教,一 一从自己胸襟流出,将来与我盖天盖地去。"师于言下大 悟,便作礼起。连声叫曰:"师兄,今日始是鳌山成 道。"

二人分襟后,师住鄂州岩头,值沙汰,于湖边作渡子,两岸各有一板,有人过渡,打板一下。师曰: "阿谁?"或曰: "要过那边去!"师乃舞棹迎之。

雪峰往福州卓庵,过沙汰后,忽有两个纳僧来礼拜和 尚。和尚才见上来,以手托木庵门,放身出外,云:"是 什摩?"其僧对云:"是什摩?"峰便低头入庵里。其僧 三五日后便辞。峰云:"什摩处去?"对云:"湖南 去。"峰云:"我有同行在彼,付汝信子得摩?"僧云: "得。"雪峰遂作信,信云: "一自鹅山成道后, 迄至于 今。同参某信付上师兄。"其僧到岩头,师问:"什摩处 来?"云:"南方来。"师云:"到雪峰摩?"对云: "到。来时有信上和尚。"便抽书过与师。师接得便问: "他近日有什摩言教?"僧云:"某甲初到时,有一则因 缘。"具举前话。师云:"他道什摩?"对云:"他无 语,便低头入庵。"师便拍掌云:"噫!我当初悔不向伊 道末后一句。我若向他道末后一句,天下人不奈何雪 峰。"其僧到夏末具陈前因缘,问师云:"师道:'我悔 不向伊道末后一句。'如何是末后一句?"师云:"汝何 不早问?"僧云:"某甲不敢容易。"师云:"虽则德山 同根生,不与雪峰同枝死。汝欲识末后一句,只这个便 是。

一日,因一婆抱一孩儿来,乃曰: "呈桡舞棹即不问,且道婆手中儿甚处得来?"师便打。婆曰: "婆生七子,六个不遇知音,只这一个,也不消得。"便抛向水中。

师沙汰时,著蝠衫,戴席帽,去师姑院里。遇师姑吃饭次,便堂堂入厨下,便自讨饭吃。小师来见,报师姑,师姑把拄杖来。才跨门,师便以手拔席帽带起。师姑云: "元来是奯上座。"被师喝出去。

师后庵于洞庭卧龙山,徒侣臻萃。

示众云: "夫大统宗纲中事,须识句。若不识句,难 作个话会。甚么是句?百不思时,唤作正句,亦云居顶, 亦云得住。亦云历历,亦云惺惺,亦云的的,亦云佛未生 时, 亦云得地。亦云与么时。将与么时, 等破一切是非, 才与么, 便不与么, 便转辘辘地。若也看不过, 才被人刺 着,眼盵瞪地,恰似杀不死底羊相似。不见古人道: '沉 昏不好,须转得始得'。触着便转,才与么,便不与么。 是句亦划, 非句亦划, 自然转辘辘地。自然目前露裸裸 地,饱齁齁地,不解却,不解咬。不见道: '却物为上, 逐物为下。'瞥起微情,早落地上,若是咬猪狗眼赫赤。 若有人问如何是禅?向伊道: '合取屎孔着!'却有些子 气息, 便知深浅, 硬纠纠地, 汝识取这个狸奴面孔。与么 时,不要故垛伊,不要称量伊。于中有一般汉,撞着物, 不解转, 刺着屙辘辘地, 这般底槌杀百千万个, 亦无罪 过。若是本色底, 拨着便上, 咬人火急, 却似刺猬子相 似,未触着时,自弄毛羽,可怜生!才有人拨着,便嗔斗 诟地,有甚么近处! 若也未得,与么荡荡地,唤作依句修 行,有则便须等破。与么时,一物不存,信知从来学得一 切言句, 隘在胸中, 有甚么用处, 不是道。辟观辟句, 外 不放入, 内不放出, 截断两头, 自然光烯烯地, 不与一物 作对, 便是无诤三昧。兄弟, 若欲得易会, 但向根本明 取, 欲出不出, 便须转, 一口咬断后, 不用寻伊去住底远 近,但放却,自然露裸裸地,不用思搭着,昏昏地。才有 所重, 便成窠臼, 古人唤作贴体衣病, 最难治。是我向前 行脚时,参着一两处尊宿,只教日夜管带,坐得骨臀生 胝, 口里水漉漉地, 初向然灯佛肚里, 黑漆漆地, 道我坐 禅守取。与么时,犹有欲在。不见道:无依无欲,便是能 仁。古人道: 置毒药安乳中, 乃至醍醐, 亦能杀人。这个 不是汝习学得底,这个不是汝去住底,不是汝色里底,莫 错认门头户口,赚汝腊月三十日,赤哄哄地,无益。当莫 造作捏怪,但知着衣吃饭,屙屎送尿,随分遣时,莫乱 统。诈称道者,有一片衣,不敢将出晒,恐人见,失却道 者名。图人赞叹,作与么不重心行? 兄弟, 亦不要信他绳 床上老榾檛, 屙辘地地, 将谓好诳呼人, 别作地狱着汝 在,信知古风大好。不见道:有即是无,无即是有。与么

送出来,便知深浅。这个是古格,于中有一般汉,信彩吐出来,有甚么碑记!但知唤作禅道,但知唤作一句子,软嫩嫩地,真是无孔铁锤,聚得一万个,有甚么用处!若是有筋骨底,不用多诸处行脚,也须带眼始得,莫被人谩。不见道: '依法生解,犹落魔界。'夫唱教须一一从自己胸襟间吐得出来,与人为榜样。今时还有与么汉么?第一切须识取左右句,这个是出头处。识取去底,识取住底,这个是两头句,亦是左右句,亦唤作是非句。才生便咬,自然无事。兄弟,见与么说,还会么?莫终日哄哄地,亦无了期。欲得易会,但知于声色前,不被万境惑乱,自然露裸裸地,自然无事。送向声色前,荡荡地,舍似一团火相似,触着便烧。更有甚么事!不见道: '非是尘不侵,自是我无心。'时热,珍重!"

上堂: "吾尝究《涅槃经》七八年,睹三两段义似衲僧说话。"又曰: "休!休!"时有一僧出礼拜,请师举。师曰: "吾教意如:文字三点。第一向东方下一点,点开诸菩萨眼。第二向西方下一点,点诸菩萨命根。第三向上方下一点,点诸菩萨顶。此是第一段义。"又曰: "吾教意如摩醯首罗,擘开面门,竖亚一只眼。此是第二段

义。"又曰: "吾教意犹如涂毒鼓,击一声远近闻者皆丧。此是第三段义。"时小严上座问: "如何是涂毒鼓?"师以两手按膝,亚身曰: "韩信临朝底。"严无语。

有僧辞,师问:"甚么处去?"云:"入岭礼拜雪峰去。"师云:"雪峰若问岩头如何?但向他道,近日在湖边住,只将三文,买个捞波子,捞虾捷蚬。且恁么过时。"

僧到雪峰,峰问:"甚处来?"云:"岩头来。"峰云:"有何言句?"僧举前话。峰云:"穷鬼子,得与么快活。"

夹山下一僧到石霜,才跨门便道: "不审。"霜曰: "不必,阇黎。"僧曰: "恁么则珍重。"又到师处,如前道"不审"。师嘘一嘘。僧曰: "恁么则珍重。"方回步,师曰: "虽是后生,亦能管带。"

其僧归,举似夹山。山上堂曰: "前日到岩头、石霜底阿师出来,如法举似前话。"其僧举了。山曰: "大众还会么?"众无对。山曰: "若无人道得,山僧不惜两迭眉毛道去也!"乃曰: "石霜虽有杀人刀,且无活人剑。岩头亦有杀人刀,亦有活人剑。"

师与罗山卜塔基,罗山中路忽曰: "和尚。"师回顾曰: "作么?"山举手指曰: "这里好片地。"师咄曰: "瓜州卖瓜汉!"又行数里歇次,山礼拜问曰: "和尚岂不是三十年前在洞山而不肯洞山?"师曰: "是。"又曰: "和尚岂不是嗣德山又不肯德山?"师曰: "是。"山曰: "不肯德山即不问,只如洞山有何亏阙?"师良久曰: "洞山好佛,只是无光。"山礼拜。

大彦上座初参见师,师在门前耘草次,彦上座戴笠子堂堂来,直到师面前,以手拍笠子,提起手,云:"还相记在摩?"师站得把草,拦面与一掷,云:"勿处!勿处!"他无语,便被师与三掴。后具威仪,始欲上法堂,师云:"己相见了,不要上来!"彦便转。到来朝,吃粥

了,又上。始跨方丈门,师便透下床,拦胸一擒,云: "速道!速道!"无对,被师推出。大彦叹曰:"我将谓 天下无人,元来有老大虫在。"

师见疏山来,遂洋洋而睡。山近前而立,师不顾。山 拍绳床一下,师回顾云: "作甚么?"山云: "和尚且瞌 睡。"便出去。师呵呵大笑云: "三十年弄马骑,今日被 驴扑。"

因沩山和尚于廊下泥壁次,李军容具公裳,直来请沩山访道,到沩山背后,端笏而立。沩山回首便侧泥盘作接泥势,侍郎便转笏作进泥势。沩山当下抛泥盘,与侍郎把臂归方丈。师后闻此语,云:"噫!佛法已后淡薄去也!多少天下,沩山泥壁也未了在。"

百丈垂语云: "与摩,不与摩。"有人举似师,师云: "我不与摩道。"便云: "与摩,与摩,不与摩,不与摩。与摩会千人万人之中,难得一个半个。"长庆与罗

山在临水宅,举此因缘,便问罗山: "与摩,不与摩,则不问。与摩,与摩,不与摩,不与摩,意作摩生?"罗山云: "双明亦双暗。"庆云: "作摩生是双明亦双暗?"罗山云: "同生不同死。"此后有人问长庆: "如何是同生不同死?"庆云: "彼此合取口。"其僧却举似罗山,罗山便不肯。其僧便问: "如何是同生不同死?"罗山云: "如大虫著角。""如何是同生同死?"罗山云: "如牛无角。"

临济有僧,放大言云: "我若见,与他拔却髭。"一日到来,作礼,欲起未起。师将衲衣角蓦面一拂。僧无语,泣泪而去。

师问僧:"甚处来?"云:"西京来。"师云:"黄巢过后,还收得剑么?"云:"收得。"师引颈近前云: "因!"僧云:"师头落也!"师呵呵大笑。

僧后到雪峰,峰问:"甚处来?"云:"岩头来。" 峰云:"有何言句?"僧举前话,峰打三十棒,趁出。 大沩喆云:"这僧黄巢过后曾收剑,却向岩头处施设,乃至雪峰面前,锋铓不露。何故?为他岩头大笑一声,直得天地陡暗,四方绝唱。若不得雪峰,几乎陆沉。不见道:杀人刀,活人剑。"

僧参,于左边作一圆相,又于右边作一圆相,又于中心作一圆相。欲成未成,被师以手一拨。僧无语,师便喝:"出!"僧欲跨门,师却唤回,问:"汝是洪州观音来否?"曰:"是。"师曰:"只如适来左边一圆相作么生?"曰:"是有句。"师曰:"右边圆相聻?"曰:"是无句。"师曰:"中心圆相作么生?"曰:"是不有不无句。"师曰:"只如吾与么又作么生?"曰:"如刀画水。"师便打。

僧问雪峰: "声闻人见性,如夜见月。菩萨人见性,如昼见日。未审和尚见性如何?"峰打拄杖三下。僧后举前语问师,师与三掴。

瑞岩问: "如何是毗卢师?"师曰: "道甚么!"岩再问,师曰: "汝年十七八。"末问: "弓折箭尽时如何?"师曰: "去!"

僧问: "无师还有出身处也无?"师曰: "声前古毳烂。"问: "堂堂来时如何?"师曰: "刺破眼。"

僧问: "利剑斩天下,谁是当头者?"师曰: "暗。"僧拟再问,师咄曰: "这钝汉出去!"

问: "不历古今时如何?"师曰: "卓朔地。"曰: "古今事如何?"师曰: "任烂。"

问: "如何是岩中的的意?"师曰: "谢指示。"曰: "请和尚答话。"师曰: "珍重!"

问: "二龙争珠, 谁是得者?"师曰: "俱错。"

问:"如何是三界主?"师曰:"汝还解吃铁棒么?"

问: "三界竞起时如何?"师曰: "坐却著!"曰: "未审师意如何?"师曰: "移取庐山来,即向汝 道。"

问: "起灭不停时如何?"师喝曰: "是谁起灭?"

问: "轮中不得转时如何?"师曰:"涩。"

问: "路逢猛虎时如何?"师曰:"拶。"

问:"如何是道?"师曰:"破草鞋,与抛向湖里著。"

问: "万丈井中如何得到底?"师曰: "底。"僧再问,师曰: "脚下过也!"

问:"古帆未豹时如何?"师曰:"小鱼吞大鱼。" 又僧如前问,师曰:"后园驴吃草。" 迩后人或问佛、问法、问道、问禅者, 师皆作嘘声。

师尝谓众曰: "老汉去时,大吼一声了去!"

唐光启之后,中原盗起,众皆避地,师端居晏如也。 一日贼大至,责以无供馈,遂剚刃焉。师神色自若,大叫 一声而终,声闻数十里。即光启三年丁未四月八日也。门 人后焚之,获舍利四十九粒,众为起塔,谥清严禅师。